

君子堂日詢手鏡
嶠南瑣記



鏡手詢日堂子君

撰 濟 王

王雲五主編

叢書集成初編

君子堂日詢手鏡及其他一種

中華民國二十五年十二月初版

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

紀錄彙編卷之一百六十三

君子堂日詢手鏡

王濟

有樹曰龍骨其根大者如栢椹幹如臂而區新發者亦然根至顛頂皆有刺手不可觸以之編籬堅過於墉伐枝插地即活皮色青翠可愛葉如楊梅十月後脫至三月發幹葉俱有白汁其花黃心紅瓣蒂著幹廣東又呼爲火殃酉陽雜俎中有慎火木亦名護火多種盆缶中置屋上開紅白花倦遊錄以雜俎所云者即龍骨樹又名烽火木斷之有白

汁所見龍骨誠如倦遊錄所言但不言有刺以其
稱龍骨故畧之爾若云其汁着人肌膚遂成瘡疥
則余未之知意者雜俎所載慎火木或別有種

有一種人名曰山子即夷獠之屬初爲亂守禦本州
馴象衛鄧指揮者招撫居之各山聽其樹藝官無
所擾今皆安其土矣尚呼鄧氏後爲主人其俗語
音與華不同男婦皆徒跣短裳婦人以他髮雜已
髮盤髻作大堆重可數斤上覆青布簪大頭銀釧
耳至百餘耳綴數環男子花青布裹頭亦以耕織
爲生就山伐巨木橰爲盆盎鍋蓋鼓鞋之屬入城

貿易其夫妻未嘗同宿但於晴晝牽臂入山擇僻處盡一日之樂旣入則於路口插松竹以斷來者謂之插青見者卽返或誤入則加以刀弩死且不顧若婚嫁則又可笑有女之家初不計財惟檳榔數裹爲聘結婚時男家有媒氏至女家立門外不敢輒入伺主人出以期告主人不諾卽辭去不敢言明日復往伺如初主人諾則延媒氏入飲及期婿偕媒氏携果盒往將及女家婿止近舍媒氏及門女躡新草履負襟挾繖繖上仍繫雙草履隨媒氏往壻所解履授壻壻穿履引之而去媒與父母

者畢反不顧有子方偕壻歸寧

土俗婚嫁有期女家於近村倩能歌男嬾一二十人或三四十者至期同男舁轎至衆集女門女登轎夾而歌之互相應答驪笑而行聲聞數里望及男家室廬各皆散去男家携酒肉道飼之此附郭之俗雖衣冠家不廢惟城中軍衛所居尋江浙人故不染此俗若僻遠村落則新嬾徒行歌者如附郭其俗尤有不可觀

每歲元旦或次日里中少年裂布爲帕挾往村落覓處女少嬾相期答歌凡者男子以布帕投女女解

所衣汗衫授男子歸謂之拋帛至十三日男子衣其衫而往父毋欣然迎欸男左女右班坐一室各與所期互相答歌隣親老稚畢集觀之人家男女者各期一男是日皆至歡歌至十六日乃罷歸歸時女以前帕巧刺文繡還男子男子亦以汗衫歸之女嬾之父並未有別往赴期者一州之民皆然雖千指之家亦有此惟城中有附郭無此俗中或有故事皆曖昧

余見彼中竹有數十種與吳浙不同衮竹節疎幹大體厚截之可作汲桶筍生七八月間味微苦土人

跨之余以爲不逮湖州棲賢猶竹筍與杭之杜園
遠甚惜彼中莫知其味不可與語釣絲竹亦踈節
幹視衮竹差小枝稍細而長葉繁可織爲器筍亦
可餐一名蒲竹人取栽爲屋瓦并編屋壁最堅美
又有笏竹大如釣絲自根至梢皆密節節有刺長
寸許山野間每數十家成一村共植此竹環之以
爲屏翰則蛇鼠不能入足可爲備禦計聞徭賊亦
皆恃此爲金湯官軍亦無可奈何後見續竹譜云
南人呼刺爲筍音勑邕州舊以爲城蠻蜚來侵不能
入今鬱林州種此城外呼爲護城桂海虞衡則書

以笏不知孰是又有班竹甚佳卽吳地稱湘妃竹者其班如淚痕杭產者不如亦有二種出古辣者佳出陶虛山中者次之主人裁爲筴甚妙余携數竿回乃陶虛者故不甚佳吳人甚珍重以之爲扇材及文房中祕閣之類丈許值錢二三百文山間野竹種類甚多

余初至橫之郊尚舍許名謝村聞挽夫譚然頃之一夫持一獸來獻名竹鼠云極肥美嶺南所珍其狀絕類松鼠大如兔重可二三十斤余睇視良久叱還而去後至州解與諸士大夫談及皆果云此鼠食

筍故腴美得之最艱余以爲簡冊有載竹黽者卽此杭湖諸山亦或有之但人未知其美故不取耳橫人好植蘭至蓄百十餘本者其品不一紫梗青花者爲上青梗青花次之紫梗紫花又次之餘不入品大率種時亦自有法將山土水和勻搏成茶甌大以猛火煨令紅取出錘碎雜以皮屑納盆缶中二八月間分種時而澆之則一莖著三十餘花以火煨土者蓋其根甚甘恐蚯蚓螻蟻傷之耳花時則數盆室中芳馥可愛門外數百步皆知其有蘭矣世傳閩蘭最勝若此橫之蘭品亦未必下

吳淞間嘗有俗嘖云見事難成則云湏缺樹花開余
於橫之馴象衛殷指揮貫家園中見一樹高可四
三尺幹葉皆紫黑色葉小顙石楠質理細厚余問
之殷云此缺樹也每遇丁卯年乃花吾父丁卯生
其年花果開移置堂上置酒歡飲作詩稱慶其花
四瓣紫白色如瑞香瓣較少團一開累月不凋嗅
之乃有草氣余因憶缺樹花開之說且謂不到此
地又焉知真有是物耶

州治北數里有山名古鉢以形如覆鉢故名上有一
女郎神廟余職歲祀事嘗一至焉其山視諸山頗

秀拔當入嶺處有深澗淙淙不絕石梁跨之逕路
縈紆松栢樟榕諸木蓊鬱可愛路平有屋三楹名
半山亭殷指揮貫重建余爲記于石由半山轉百
餘磴有一坡極平坦復上數十磴有大榕木夾道
離立過此卽絕頂神廟在焉四顧遠近諸山若揖
拱不暇者南望州治大江寶華諸山皆在指顧山
後林木一望無際誠一州之勝也考宋元諸碑神
乃有唐姓陳一嬾人嘗縱鯉一日道遇白衣人告
云可速携家避古鉢山上此地明日將爲巨浸矣
還告其夫愴惶挈家方至半山其地已陷今存龍

池塘數十頃卽是後其婦遂神此山前所謂白衣人蓋所縱之鯉報活已恩也唐宋及我皇明皆有夫人之封著在祀典橫人至今不食鯉云

州城南門外渡江陸行數里有寶華山銳峭秀拔學宮正南一望屹然對峙術者以爲文筆峰故科不乏人余屢欲一登終以事阻人云其中逕路巖洞縈紆幽迥不可名峭壁怪石奇險峻拔又豈可愛中有一寺亦以山名今已圯廢中殿巋然僅存旁舍存數野衲而已聞昔嘗居千僧一巨鍋炊可餉數百人者尚漫沙土中地出兩耳人行其中不礙

間嘗有見浮出溪澗者次日相率往觀居然在焉
見則其歲有兵荒又有神僧騎鹿或虎徃來山間
此說近誕姑以紀異

其土多奇花異卉有不可名狀者於牡丹芍藥則無
仕宦携歸雖活不花人呼佛桑爲牡丹更可笑佛
桑有深紅深紫淺紅淡紅數種剪插於土卽活茉
莉甚廣有以之編籬者四時常花又有似茉莉而
大瓣微尖其香清絕過於茉莉土人呼爲狗牙余
病其卉佳而名不雅故改爲雪瓣時漸有人以雪
瓣呼之美又一花名指甲五六月開花細而正黃

頗類木犀中尋須酌香亦絕似其葉可染指甲其
紅過於鳳仙故名甚可愛彼中亦貴之後閤嵇含
南方草木狀云胡人自大秦國移植南海又嘗見
山間水邊與叢楚籬落間紅紫黃白千態萬狀四
時不絕余愛甚每見必稅駕延佇者久之若同吳
浙所有者亦爲不少不可備述矣

果蓏之屬大率不逮吳浙遠甚以余所見惟蓮房西
瓜甘蔗栗四品與吾地彷彿雖有桃李梅梨數品
然皆不候時熟卽入市青硬酸澁不可噉杏子林
禽地素不產土人不之識楊梅大者如荳如吾地

所無者荔枝龍眼蕉實三品甚佳又有名九層皮者脫至九層方見肉熟而食之其味艷栗又一種名黃皮果狀如楝子味酸又有餘甘子如小青李味酸澁餘味甘亦不甚美橄欖烏欖二者甚多俱野生有力恣意可取市中十錢可得一大擔土人炒以進飲復有人面果冬桃山栗子木饅頭山核桃陽桃逃軍糧等野果種類更甚然西瓜雖美四月即可食至五月已無桃李枇杷二三月間即食四月俱已摘盡惟栗與甘蔗用方久耳

余初到橫入南郭門適成市荷檐貿易百貨塞途悉